

新 倩 籍
吳 郡 二 科 志
江 西 詩 社 宗 派 圖 錄



新

倩

籍

徐禎卿
撰

中
華
書
局

紀錄彙編卷之一百二十二

新倩籍叙

徐禎卿

余少何延大人之惠幸弛肩擔緣經術以舉諸生竊
不遜與從事二三君子之末斯人俱有髦雋材器角
名文墨中居止暱近相與競騶密樂締金石之固要
在不遺吾願識其誠言其就白頭廼究耳但羽翮各
盡靡可品列茲在身後自有權度之區因綜核志行
綢緝如左貽之將來俾可考焉

紀錄彙編卷之一百二十二

新倩籍

徐禎卿

唐寅字伯虎雅資踈朗任逸不羈喜翫古書多所博
通不爲章句屬文務精思氣最隄厲嘗負陵軼之志
庶幾賢豪之蹤俛仰顧眄莫能觸懷家貲微賤而饜
習優汰不能自裁日以單瘠跼然處困啣杯對友引
鏡自窺輒悲以華盛時榮名不立俟河之清人壽幾
何恐世卒莫知沒齒無聞悵然有抑鬱之心乃作昭
恤賦以自見又嘗自論曰嗟乎唐生何志之肆而材

之縮邪君使剖質相明亦足以彰偉觀流薄曜也素
伉於意氣怪世交鄙甚要盟同比死生相護毋遺舊
恩故長者多介其誼聚云

系曰有鳥驕斯高飛提提飲擇清流棲羞卑枝倣
蕩激揚操比俠士超騰蹕詭又類君子長鳴遠慕
顧命儔似猥叙苦辛仍要素辭與子同心願各不
移恒共努力比翼天衢風雨凌敝未勿散飛天地
閉合廼絕相知

文壁字徵明篤好據古治聞舊事善議論學者咸高
之性專執不同於俗不飾容儀不近女妓意淡薄儔

張有小過時見排抵人有薄技亦往往歎譽焉述造
勤工常矯諸友曰君等並持款說而璧獨操翰自苦
營之驟驢泛駕蹇牛負輓誠不可共語也與諸生朱
良育善良育亦卓雅通古謂璧曰夫祿不能代養榮
不能庇身時逝日莫將愁厄之不勝子其計之璧曰
否否命不可枉時不可忽人生寔難不勤何獲忝何
計經經之憂反不因邪子行矣無戾我圖異日當不
苦余言也良育竟深賢之余甚儒其狷志賦詩以廣
之云爾

蒞生茨蒿中芬臭不相連朱紫本異色觀者苦自

眩憤憤世俗間方類千萬端君子尚貞詭薄庶好
驕揚磁石能引鍼砥礪乃獨堅鸞鳳不從群何況
於高賢含和而不同聖哲所彌焉飛蠅惡熱羨勗
哉復何言

邢參字麗文爲人沉靜有醞藉固而不陋嘉遯城市
不惡榮祿貧無恒業嘗教授鄉里以著述自娛無所
干同人皆尚之參志旣高而材學精美多屈士子僉
以參之淑懿有四焉養和靖躁汪汪德心恬泊處約
一何潔操文優氣柔君子之思奮槩履方恂恂誼士
近之不厭遠之有望是其爲人者乎余因作歌以申

歡慕辭曰

雲中鵠子鳴且蜚三三五五將焉歸歸在外野獨徘徊從朝無梁暮不炊於何求乎蘆之漪我將往饋羹中魚將子不饑兮我心愉

張靈字夢晉性聰明善習技巧家本貧窶而復挑達目恣不脩方隅不爲鄉黨所禮惟祝允明嘉其才因受業門下嘗作文以厲之闕涉篇籍能潛識強誦文思便敏驕曼可采但恨生命逼苦遭歷艱困禍殃紛然內無僮僕躬操力作饔飧不繼父母妻子愁思無聊偃息弊廬喟然長歎結心鬱志不遂所懷然不能

感激立節君子有所嘲焉其詩曰

咄咄張豎生時命一何迫窘狂趨欲何之家無斗
石儲爲汝戚戚復戚戚撫蓄老幼當從何須晨起
弗躑躅且往探囊貲空負文史腹腸枯竟奚爲寒
冬十月裏無重襦短褐聊庇形豈有貂麕之華衣
杵臼不聞舂稚子前告饑寧逢猛虎闌安忍兒女
啼滄浪之天弗用信之賢愚混厚薄若何徒區區
芝蘭輟爲草行當隕塵泥悲哉悲哉令人瘁思昔
在原憲環堵蕭如仲蔚高士蓬蒿閉居總繼厥後
賢名企踵辭曰湯湯黃河一何深百尺蟠蛟中夜

鳴爲君翹車馳洛京思將誰從邈無朋飯彼莠
終何以聊生

錢同愛字孔周早負才思不受俗訓善文采夸飾脩
容軼蕩間濶雅爲士林所獎嘗挫溺於時意氣激揚
耿然有青雲之思庶騰顯美志爲終身名惜其不遂
廼專精古學諷閱傳記心朗性明目涉知義疆力自
振學有浹洽將沈蓄英華秀而求實綜成名言貽之
同好而已唐生甚信篤之常謂人曰夫健駒昂昂終
爲遠器况志士少壯奚能有量哉顙嘆其知言云歌
曰

鑽火木見毀策名神亦疲豈不踰食膽健子甘如
飴匪爲甘如飴男兒寔難爲賢者恤身後愚夫貪
厚貲人生各有重定志靡可移

